

四庫全書

集部

欽定四庫全書

歷代詩話卷二十一

歸安吳景旭撰

丙集下之下

賦

金粉

唐寅六朝金粉賦一顧傾城今再傾國胡然而帝也胡然天

吳旦生曰子畏僑居南都嘗宴一通侯家時文士雲
集即席同賦子畏先成讀至此二語侯大稱賞餘士
俱閣筆蓋子畏善作情語如自咏云四更中酒半床
病三月傷春滿鏡愁又觀燈云沈香連理三珠樹結
綵分行四照花皆極雅麗

金魚

王世貞金魚賦何水族之微淼承金儀之熠艷形表瑞
乎帝符色徵緣於灼日冠慶浪之瓊丙抱含書之丹乙

鱗奕奕而垂錦沫霏霏而布瑟

吳旦生曰屠緯真金魚品云嘗怪金魚之色相變幻
遍考魚部即山海經異物志亦不載讀子虛賦有曰
網玳瑁鈎紫貝及魚藻同置五色文魚因知其色相
自來本異而金魚特總名也余按述異記關中有金
魚神云周平二年十旬不雨祭天神金魚躍出而雨
降又屈原九歌乘白龜兮逐文魚王逸注鯉魚也或
即此種則前此已有之當不始於漢賦抱朴子云丹

水有丹魚夏至十夜伺魚浮出水有赤光如火博物
志云金魚出功婆塞江腦中有金述異志云晉桓冲
遊廬山見湖中有赤鱗魚洛神賦騰文魚以警乘戴
叔倫詩池塘養錦鱗于念東詩躍水朱光溜嘉靖中
王元美詩猩紅數點媚清泠吳明卿詩水面文魚作
隊行

帝京景物畧云魚之種深赤曰金瑩白曰銀其魚金
貴乎其銀周之其魚銀貴乎其金周之而別以管若

筴管者鬣下而尾上周其身者也。筴者不及鬣周其

尾者也。魚病二曰蝨曰瘟。

瘦而白點生蝨也。治以糞浸新磚投之。鱗張如脫者。

瘟也。法以新

藍布擦之。

魚死三吞肥皂水得一死。橄欖粗得二

死。核桃皮水得三死。天將雨魚拍拍出水面水底蒸如熟湯也。

韻語陽秋云潮州精舍寺池有金鯽魚數年一現。故白樂天詩唯有上强精舍寺最堪游處未曾游。蓋為此也。臨安六和寺亦有金鯽池。蘇子美詩沿橋待金

鯽竟日為遲留亦以其出有時故竟日待之爾自子
美之後四十年東坡始遊茲寺嘗投餅餌待之乃畧
出不食坡謂此魚難進易退而不妄食宜其壽若此
作詩云我識南屏金鯽魚今亦貴鯽不售鯉余按元
馬虛中訪西湖玉公詩池中金鯽疑龍在歸路殘雲
帶雨回正指此至崇禎初譚服膺詩士女相呼看金
鯽歡盡趣竭餅餌擲乃用東坡六和故實以咏燕都
之金魚池也

程史云今中都有鮪魚者能變魚以金色鯽為上鯉次之貴游多鑿石為池置之簷牖間以供玩或云以闌市洿渠之小紅蟲飼凡魚百日皆然初白如銀次漸黃久則金矣

姓州

王世貞登釣臺賦夫一介之賤微靈誠感而燭天遂姓其州而貌其山者千五百年

吳旦生曰呂太史釣臺記云姓是州曰嚴丘瓊臺詩

云祚終四百已無漢州歷千年尚姓嚴王季重嚴灘
詩云誰何一男子舉州冒其姓自古及今沿習之譌
不禁輒然欲笑螢雪叢說有一絕云誰知避諱更嚴
氏灘與州名總悞稱余喜此絕為有學識因為晰言
之按袁宏後漢書云皇帝諱陽一名莊字子麗於是
顯宗諱莊悉改莊為嚴故莊子陵為嚴子陵卞莊為
卞嚴莊君平為嚴君平觀華陽國志莊遵字君平成
都人也然而稱君平者每云博覽亡不通依老子嚴

周之旨著書十萬餘言又叙傳云貴老嚴之術老老子也嚴莊周也其他又以辨裝為辨嚴治嚴或以為稱人當曰辨嚴自稱曰辨裝不知辨嚴即辨裝而避莊字并同音之裝字亦避耳據此則嚴州合名莊州嚴陵灘合名莊陵灘今漫然曰姓其州而不攷之可乎况宣和間方臘寇江浙始改睦州為嚴州則計其歲月幾何而謂之千五百年乎李西涯寄莊孔暘詩清時例有逃名客見說嚴陵本姓莊最可証

金少隱先生集卷二十一
楊升庵云古人避諱改字自有意義明帝諱莊改莊助為嚴助莊子陵為嚴子陵以莊與嚴古同音殷武詩叶音是其証也

子陵碣畧云光本姓莊字子陵本新野人避亂會稽范史以為會稽人悞矣其妻梅福季女也胡元瑞云按徐道暉詩梅福神仙者新知是婦翁最明可証

老學庵筆記云今人謂具州為甘陵吉州為廬陵常州為毗陵峽州為夷陵皆自其地名也惟嚴州有名

嚴陵灘嚴陵乃其姓字灘是釣處若謂之嚴灘尚可
今俗謂之陵殊可笑也

熠燿

王世貞二鳥賦師名之曰丹鳥而字以熠燿

吳旦生曰大戴傳螢謂之鳥者重其養也凡有翼者
為鳥困學紀聞云幽風熠燿宵行傳云熠燿燐也朱
子謂熠燿明不定貌宵行蟲名如蠶夜行有光如螢
其說本董氏而說文引詩熠燿宵行熠盛光也末章

云倉庚于飛熠燿其羽其義一也楊升庵云熠燿之
訓為螢火久矣今疑末章有倉庚于飛熠燿其羽遂
以熠燿為明貌而以宵行為螢火固哉其為詩也古
人用字有虛有實熠燿之為螢火實也熠燿為倉庚
之羽虛也謂倉庚之羽如熠燿之明非謂熠燿即倉
庚也今元美賦云字以熠燿其意與升庵同古今注
螢火一名耀夜一名景天一名熠燿一名丹良一名
燐一名丹鳥一名夜光一名宵燭

水母屋瓦

屠隆溟海波恬賦水母目蝦屋瓦江珧

吳旦生曰郭璞江賦注水母俗名海舌食物本草云
水母即海𧄢𧄢音涉今人以蜚字當之訛也類編云
水母名曰蛇形如覆笠以蝦為目蝦動蛇沈蓋常有
蝦依之以衆為目蝦見人則驚此物亦隨之而沒故
云目蝦越絕書云海鏡蟹為腹水母蝦為目蘇子由
詩去住由人真水母簞瓢粗足似山雌

嶺表錄異云南中舊呼為蚶子頃因盧鈞尚書作鎮
遂改為瓦屋子以其殼上有稜如瓦壠故名焉海物
異名記云天嚮瓦壠蚶子也南州志贊云海蛤魁陸
瓦壠鑛殼外眉內渠形質渾朴注云眉高為眉渠疏
為渠

歷代詩話卷二十一

欽定四庫全書

集部

歷代詩話卷二十二至

詳校官侍讀學士_臣陸伯焜

侍讀_臣孫球覆勘

總校官知縣_臣繆琪

校對官中書_臣李斯咏

謄錄監生_臣章玉輅

欽定四庫全書

歷代詩話卷二十二

歸安吳景旭撰

丁集上之上

古樂府

富媼

郊祀歌云后土富媼昭明三光

吳旦生曰張晏注坤為母故稱媼郊祀歌別章又云

惟泰元尊媼神蕃釐注泰元天也媼神地也楊升庵
謂氣曰煦體曰嫗天以氣煦之地以形嫗之后土富
媼亦此義凡此皆地作媼矣余觀吳斗南謂媼當作
媼按賈誼新書云德渥澤洽調和大暢則天清徹地
富媼物時熟是知漢時之語意

籥

天馬歌云精權奇籥浮雲

吳旦生曰籥古躡字言天馬上躡浮雲也隴上歌云

隴上壯士有陳安驕驄丈馬銖鍛鞍按驕亦古驕字
蘇東坡次韻趙伯充畫馬云十駕均一至何事簡雲
風元厚之詩仙驥簡雲穿仗下

象載

漢郊祀歌象載瑜白集西

吳旦生曰容齋三筆謂象載瑜章曰象載瑜白集西
顏師古云象載象輿也山出象輿瑞應車也赤蛟章
曰象輿轡即此也而景星章曰象載昭庭師古云象

謂懸象也。懸象祕事昭顯於庭也。二字同出一處而自為兩說。按樂章詞意正指瑞應車言。昭列於庭下耳。三劉漢釋之說亦得之。而謂白集西為西雍之麟。此則不然。蓋歌詩凡十九章。皆書其名於後。象載瑜前一行云。行幸雍。獲白麟。作自為前篇。朝隴首。覽西垠之章。不應又於下篇贅出之也。余觀樂府原題云。漢武帝郊祀之歌十九章。朝隴首十七。注元狩元年。行幸雍。獲白麟。作象載瑜十八。注太始元年。行幸東。

海獲赤馬作據此則容齋之言益信

房中

劉元成語錄曰西漢樂章可齊三代舊見漢禮樂志房中樂十七章格韻高嚴規模簡古駸駸乎商周之頌噫異哉此高帝一時佐命功臣下至叔孫通輩皆不能為此歌尋推其原乃唐山夫人所作服虔曰高帝姬也韋昭云唐山姓也漢初乃有此人縱使竹竿載馳方之陋矣

吳旦生曰王弼州謂唐山夫人雅歌之流調短弱未舒耳余以短弱未舒非所以論樂章樂章類多質奧但房中樂亦自成漢初絕調耳至謂賢於竹竿載馳不又擬之失倫乎按樂府原題云房中樂者婦人禱祠於房中也故宮中用之高祖好楚聲故房中樂楚聲也孝惠二年使樂府令夏侯寬備其簫管更名曰安世樂困學紀聞云周有房中之樂燕禮注謂弦歌周南召南之詩漢安世房中樂唐山夫人所作魏繆

襲謂安世歌神來燕享永受厥福無有二南后妃風
化天下之言謂房中為后妃之歌恐失其意通典平
調清調瑟調皆周房中之遺聲

秋

安世房中歌云飛龍秋遊上天

吳旦生曰漢書蘇林注云秋飛貌顏師古注云莊子
有秋駕之法者亦言駕馬騰驤秋秋然也

歷代詩話卷二十二

欽定四庫全書

歷代詩話卷二十三

歸安吳景旭撰

丁集上之下

古樂府

聲辭

楊升庵曰漢鏡歌十八曲古今樂錄謂其聲辭相雜不復可分是也大字是辭細字是聲聲辭合寫故致然爾

此說卓矣近世有好奇者擬之韻取不協字用難訓亦好古之弊胡元瑞曰饒歌聲文相亂處誠有之然如妃呼稀收中吾之類亦不多見其他句字嶮仄自是一時體格如此觀繆襲韋昭所擬其時去漢不遠其體格大率相同即漢人本詞可知

吳旦生曰漢時有鼓吹曲而短簫饒歌其一章耳諸曲調皆有聲有辭故聲辭合寫此不易之論也按饒歌之妃呼稀收中吾與他曲之羊吾夷伊那何之類

乃遲其聲以送之耳夫被於歌聲而又譜以辭者殆
所謂聲依永也後人擬之縱循厥本旨酷肖體裁而
難協於律終是永依聲矣况復辭乖其旨背離寢失
耶沈休文云樂人以音聲相傳詞詁不復可解正謂
聲辭相雜而胡元瑞以嶮屹為體格非深於樂府者
尤笑王弼州謂饒歌十八中有難解及迫詰屈曲者
如絲如魚乎悲矣堯羊蜚從王孫行之類或有缺文
斷簡其誤處既不能曉佳處又不能識直以為不足

觀曾解人而作是語也

陸文裕公曰鄭漁仲謂樂以詩為本詩以聲為用又謂古之詩今之詞曲也若不能歌之但能誦其文而說其義可乎世儒義理之說日勝而聲歌之學日微馬貴與則謂義理布在方冊聲則湮沒無聞其言皆有見而朱文公亦謂聲氣之和有不可得聞者此讀詩之所以難也夫樂之義理詩詞是也聲歌猶後世之腔調也兩者俱詣乃為大成漁仲又謂樂之失自

漢武始蓋言亡其聲耳漢世樂府如朱鷺君馬黃雉
子斑等曲其辭皆存而不可讀想當時自有節拍短
長高下故可合於律呂後來擬作者但詠其名物詞
雖有倫恐非樂府之全也且唐世之樂章即今之律
詩而李太白立進清平調與王維之陽闕曲於今皆
在不知何以被之弦索宋之小詞今人亦不能歌矣
今人能歌元曲南北詞皆有腔拍如月兒高黃鶯兒
之類亦有律呂可按一入於耳即能辨之恐後世一

失其聲亦但咏月咏鶯而已此樂之所以難也

朱鶯

樂府原題曰鶯惟白色漢有朱鶯之祥因而為詩梁元帝放生碑云玄龜夜夢終見取於宋王朱鶯晨飛尚張羅於漢后謂此也樂府解題曰此蓋因飾鼓以鶯而名曲焉

吳旦生曰朱鶯者據樂志建鼓殷所作棲鶯於其上取其聲揚或云鶯者鼓之精故吳王啟地門以厭越

越為雷門擊大鼓於下而地門聞焉後移鼓建康之
端門有雙鷺出鼓而飛予雲末或云詩振振鷺鷺于
飛鼓咽咽古之君子悲周之衰頌聲息飾鼓以存鷺
然此皆言鷺鳥也至宋何承天作朱路篇云朱路揚
和鸞翠蓋耀金華直稱為路車與漢曲異矣

禽經云朱鷺不攫肉朱鷺不吞鯉梁簡文與劉孝儀
令云鷺舟乍動朱鷺徐鳴詩義疏云楚威王時有朱
鷺合沓飛翔而來舞

雅荷

朱鷺魚以烏鷺何食食茄下

吳旦生曰烏字與雅同言朱鷺之威儀魚魚雅雅也
說文茄芙蕖莖俗但借為蔬菰名非本訓也爾雅荷
芙蕖其莖茄其葉蓮其本密其華菡萏其實蓮其根
藕其中萼萼中薏郭璞云蜀人以藕為茄張揖云茄
音荷國風有蒲與荷樊光注爾雅引詩有蒲與茄揚
雄反離騷云衿芰茄之綠衣注茄古荷字張衡西京

賦蒂倒茄于藻井注茄藕莖也李白詩胡為啄我茄
下之紫鱗金人蕭真卿採蓮曲云田田青茄荷艷艷
紅芙蕖

艾如張

樂府原題曰溫子昇辭云誰在閑門外羅家諸少年張
機蓬艾側結網槿籬邊若能飛自勉豈為繒所纏黃雀
儻為戒朱絲猶可延此艾如張之事也觀李賀詩有艾
葉綠花誰翦刻中藏禍機不可測似翦艾葉為蔽張之

具也

吳旦生曰艾與刈同說文艾草也如讀為而猶春秋
星隕如雨也故古辭艾而張羅其意蓋謂刈而張羅
也按穀梁傳艾蘭以為防置旃以為轅門謂因蒐狩
以習武艾草以為田之大防是也若云張機蓬艾側
是以艾為蓬艾恐失本意

上之回

樂府解題曰漢武帝元封初因至雍遂通回中道後數

遊幸焉其歌稱帝遊石關望諸國皆美當時之事也

吳旦生曰三輔黃圖云回中宮史記秦始皇二十七年巡隴西北地出笄頭過回中漢書文帝十四年十四萬騎入蕭關殺都尉燒回中宮候騎至雍武帝元封四年冬行幸雍祠五畤通回中道遂北出蕭關歷獨鹿鳴澤又有三良宮相近

上邪

漢鏡歌上邪其辭曰上邪我欲與君相知

吳旦生曰邪音移故邪與知叶何承天擬曲云上邪
下難正悞作邪正之邪矣按尚書考靈耀云虛為秋
候昂為冬期陰氣相佐德乃不邪又星名歸邪

梅花落

復齋謾錄曰古曲有梅花落非謂吹笛則梅花落詩人用
事不悟其失耳漁隱鼓話曰詩人因笛中有梅花落曲
故言吹笛則梅落者甚衆若以為失則梅花落之曲何
為笛中獨有之決不虛設也李白觀吹笛詩何人吹玉

笛一半是秦聲十月吳山曉梅花落敬亭戎昱聞笛詩
平明獨惆悵飛盡一庭梅崔櫓梅詩初開已入雕梁畫
未落先愁玉笛吹黃庭堅詩兒詩催盡落梅春已半更
吹三弄乞風光泛觀古人用事一律可見復齋之妄辯
也

吳旦生曰梅花落自是笛中曲當以胡茗溪之說為
正唐大角曲亦有大梅花小梅花等曲是也按鮑明
遠梅花落曲中云念其霜中能作花露中能作實蓋

就二句中上句花字與上之嗟字叶下句實字忽復折入與下之日質字叶奇變不測

襖襠

琅琊王歌陽春二三月單衫綉襖襠

吳旦生曰釋名衫芟也衫末無袖端也襖襠其一當胸其一當背也海篇作兩當王筠咏裁衣云襖襠雙心共一抹正謂此宋書薛安都脫兜鍪解所帶鎧惟著絳納兩襠衫馳入賊陣所向無當其鋒者齊書文

宣郊天陽休之為驍騎將軍衣兩襠用手持白梧議者服其達曠

企喻歌云齊著鐵襠襠乃馬上飾鞍之具

木蘭

滄浪詩評曰木蘭歌最古然朔氣傳金柝寒光照鐵衣之類已似太白必非漢魏人詩也隱居詩話曰木蘭詩有高致世傳為曹子建作似矣然其中云可汗大點兵漢魏時未有可汗之名不知果誰詞也

吳旦生曰王弼州謂不必用可汗為疑朔氣寒光致
貶要其本色自是梁陳及唐人手段余觀其敘事布
辭蒼拙近古決非唐手所及况魏太武時柔然已號
可汗非始於唐也解者謂木蘭朱氏女今黃州黃陂
縣北七十里即隋木蘭縣有木蘭山將軍塚忠烈廟
然據湧幢小品云隋煬帝時姓魏氏亳之譙人也從
軍一紀閱十八戰除尚書不受歸而改粧以事聞帝
奇之欲納諸宮中對曰臣無嬖君之禮以死誓拒迫

不已遂自盡追贈將軍謚孝烈立廟歲以四月八日
致祭蓋其生辰云

明駝

酉陽雜俎曰木蘭篇明駝千里脚多誤作鳴字駝卧腹
不貼地屈足漏明則行千里

吳旦生曰太真外傳上賜妃瑞龍腦十枚妃私發明
駝使持三枚遺祿山明駝者腹下有毛夜能明日馳
三百里楊升庵謂唐置驛有明駝使哥舒翰以白駝

遞而耕餘博覽乃以明駝使為異人也恐悞

漢書大月支出一封駝注脊上有一封李義山詩取
酒一封駝

歷代詩話卷二十三

欽定四庫全書

歷代詩話卷二十四

歸安吳景旭撰

丁集中之上

古樂府

筵篋引

唐子西曰古樂府命題皆有主意後人用樂府為題者
當代其人而措辭如公無渡河須作妻止其夫之詞太

白輩或失之

吳旦生曰古今注箜篌引即公無渡河霍里子高妻麗玉所作子高晨起刺船有白首狂夫被髮提壺亂流而渡其妻隨止不及遂溺死於是援箜篌鼓之作公無渡河之曲曲終亦投河死子高還以聲語麗玉麗玉以箜篌寫其聲曰箜篌引余觀曹植云置酒高殿上親友從我遊似言及時行樂又云久要不可忘薄終義所尤似及交情大非古辭之意李白有二篇

一曰公無渡河乃言渡河事一曰箜篌引亦言交情此子西所謂失之也吳正子謂歷觀前作大抵以箜篌引命題者不言叟溺以公無渡河命題者則及之皆不足語樂府矣

漢書禱祀太乙后土作坎侯坎聲也使樂人侯調作之取其坎坎應節也因其姓命曰坎侯

古今韻會云漢武令樂人侯暉依琴造鞀鞀空侯也一名坎侯鞀即古坎字野客叢書云坎國之侯名暉

也

楊升庵曰當作空侯今作箜篌加竹贅矣其器只絲木二物與竹了不相干大樂部空侯二十三絃在樂器中最大且高凡琴瑟箏箏琵琶阮咸之屬絲木相去皆未寸許惟空侯絲與木相去遠聲自空出空侯之名或因此

釋名箜篌師延所作靡靡之音空國之侯所好也客齋隨筆謂考侯國無名空者余以此言大是憤憤按

樂府雜錄云瑩篴乃鄭衛之音權輿也以其亡國之音故號空國之侯

陌上桑

樂府解題曰古辭日出東南隅照我秦氏樓舊說邯鄲女子姓秦名羅敷為邑人千乘王仁妻仁後為趙王家令羅敷出採桑于陌上趙王登臺見而悅之置酒欲奪焉羅敷善彈箏作陌上桑以自明不從按其歌辭稱羅敷採桑陌上為使君所邀羅敷盛誇其夫為侍中郎以

拒之與舊說不同若陸士衡扶桑昇朝暉等但歌佳人
好會與古調始同而末異

吳旦生曰吳兢以侍中郎之詞與家令不合遂病之
樂府原題云侍中郎漢官也恐仁為趙王家令後為
漢侍中郎也余最喜樂府集有云大抵詩人感咏隨
所命意不必盡當其事所謂不以辭害意也且發乎
情止乎禮義古詩之風也今次是詩益將體原其蹟
而以辨麗是逞約之以義殆有所未合而盧思道傳

緯張正見復不究明更為祖述使若其夫不有東方
騎不為侍中郎不作專城居乃得從使君之載歟如
劉邈王筠之作蠶不飢日未暮亦安得徬徨為使君
留哉蕭撝殷謀曾不足道而沈君攸所謂看金怯舉
意求心自可知亦庶幾焉故秋胡婦曰婦人當採桑
力作以養舅姑亦不願人之金此真烈婦之詞耳

王子喬

王弼州曰仙人有兩王喬其一即太子晉其一栢人令

天降玉棺者也楊升庵曰史記封禪書注引裴秀冀州記云緱氏仙人廟者昔有王僑犍為武陽人為栢人令於此登仙非王子喬也唐詩王子求仙月滿臺又云可憐緱嶺登仙子猶自吹笙醉碧桃蓋世以王僑為王子喬誤也久矣胡元瑞曰汲冢書師曠稱晉為王子故樂府稱王子喬非姓王氏也喬當是晉別名惟為葉縣令而飛鳧與為栢人令而食芝者則名姓俱同又同為令最易相亂非精加考核未易得之

吳旦生曰劉向列仙傳云王子喬者周靈王太子晉
也好吹笙作鳳鳴浮丘公接以上昇三十餘年見者
曰告我家七月七日待我緱氏山頭果乘白鶴翔山
頭舉手謝人而去為立祠於緱氏山下據此則緱氏
仙人廟乃太子晉事封禪注悞引入王伯儵之下而
升庵反悞認為非王子喬也元瑞指出晉為王子而
葉縣柏人又有兩人極為顯著改弇州概稱兩王喬
亦未安按海錄碎事云一王子晉王喬二葉令王喬

三服肉芝王喬皆神仙也

長歌行

滄浪詩評曰文選長歌行只有一首青青園中葵者郭茂倩樂府有兩篇次一首乃仙人騎白鹿者仙人騎白鹿之篇予疑此詞峒峒山上亭以下其義不同當又別是一首郭茂倩不能辨也

吳旦生曰觀魏文帝所賦似擬仙人騎白鹿一首陸士衡所賦似擬青青園中葵一首其詞意各合古辭

而解題謂曹魏改奏晉陸士衡不與古文合何也
峒山上亭以下細閱絕不相蒙嚴氏駁之有見

當

藝苑卮言曰古樂府悲歌可以當泣遠望可以當歸二
語妙絕老杜玉佩仍當歌當字出此用修引孟德對酒
當歌云子美一闡明之不然讀者以為該當之當矣大
嘖嘖可笑孟德正謂遇酒即當歌也下云人生幾何可
見矣若以對酒當歌作去聲有何趣味

吳旦生曰焦弱侯謂元美此言悞會用修之意矣用修正讀當為平聲如當時之當言人生對酒與當歌之時無幾耳何嘗作去聲如當泣當歸之當哉子美詩當亦作平聲若如元美讀不成詩矣

杜康

武帝短歌行何以解憂唯有杜康

吳旦生曰選注杜康或云黃帝時宰人號大謬蓋古之造酒者武帝用東方生銷憂唯酒之意故不言酒

直言杜康耳東哲勸農賦蓋田熟啖紆其腹而杜康
啗其胃白樂天詩杜康能解悶潘佑詩直儼將心付

杜康亦如劉白墮工釀東坡乃云獨對紅蕖傾白墮

也

眉公筆記杜康泉在舜祠東廡下世傳杜康用斯
泉釀酒或以揚子江水并惠山泉稱之一升重二

十四銖是泉
重二十三銖

莊馵

王粲從軍詩館宇充鄴里士女滿莊馵自非聖賢國誰

能享茲休

吳旦生曰五臣作馮音仇協韻李善注引肅肅兔置
施于中馮楊升庵謂作馮音求字从九从酋為是又
說文馮音逵九逵道也似龜背故曰馮从九首一道
為一首與馮同義而異音今人不識馮字皆從首悞
矣升庵此說最當而正楊謂韻會支尤二韻通作馮
恐未足以折升庵也

豫章行

樂府解題曰古辭今闕悞不傳陸士衡泛舟清川渚傷

離別言壽短景馳容華不久若曹植擬豫章行為窮達
傅休奕苦相篇云苦相身為女言盡力於人終以華落
見棄亦題曰豫章行

吳旦生曰樂府集謂豫章邑名漢南昌縣隋為豫章
有豫章江江連九江有釣磯陶侃少時嘗宿此夜聞
人唱聲如量米者訪之吳時有度支於此亡今考傳
玄陸機輩所作多叙別離怨恨思即知豫章昔為華
艷盛麗之區耳至唐杜牧詩尚過稱其侈靡焉

董逃行

古辭言神仙事傅休奕九弄篇十六章乃叙夫婦別離之思非也

吳旦生曰樂府原題謂此辭作於漢武之時蓋武帝有求仙之興董逃者古仙人也後漢遊童競歌之終有董卓作亂卒以逃亡此則謠讖之言因其所尚之歌故有是事實非起於後漢也余觀別本逃一作桃梁簡文行幸甘泉宮歌云董桃律金紫賢妻侍禁中

似引董賢及子瑕殘桃事終云不羨神仙侶排煙逐
駕鴻皆所未詳詩話又引漢武內傳王母觴帝索桃
七枚以四啗帝自食其三因命董雙成吹雲和笙侑
觴作者取此竊以樂府之題亦如關雎葛覃之類只
取篇中一二字以命詩非有義也若以董字桃字泥
其義此與作鏡歌巫山高雜以陽臺神女之事君馬
黃但言馬者其荒陋一也蔡寬夫所云烏生八九子
但咏烏雉朝飛但咏雉雞鳴高樹巔但咏雞大抵類

此而甚有相府蓮訛為想夫憐楊漣兒訛為楊叛兒者矣

七十二

春渚紀聞曰玉臺詩入門時左顧但見雙鴛鴦鴛鴦七十二羅列自成行孟郊薔薇歌仙機軋軋飛鳳凰花開七十有二行不知皆用七十二取義何也

吳旦生曰田子藝言是美人之數也古人多言三三美人夫三三則六而六六則為三十六矣左右各三

十六合之則為七十二矣蓋六者陰數之極而六六三十六者又純陰之數故用之婦人也余以此語未免穿鑿後見真率筆記云霍光園中鑿大池植五色睡蓮養鴛鴦三十六對望之爛若披錦故相逢行云鴛鴦七十二羅列自成行按玉臺詩乃樂府相逢行古辭也乃知古辭確有所祖可以釋陶南村之疑矣梁簡文箏賦鴛鴦七十二亂舞未成行李太白詩七十紫鴛鴦雙雙戲庭幽皆取當時相對之義

雞鳴又云舍後有方池池中雙鴛鴦鴛鴦七十二羅
列自成行蓋言方池正從園中大池入想也此樂府
亦用霍家事實楊廉夫詩別院三千紅芍藥洞房七
十紫鴛鴦此亦影借句耳若楊升庵詩芳池七十二
寶帳三千重則是池有七十二耶楊廉夫金臺篇云
上有七十二鳳凰

金鼎玉食
高顏頤

丈人

顏氏家訓曰古樂府歌辭先述三子次及三婦婦是對

舅姑之稱其末章云丈人且安坐調絃未遽央古者子婦供事舅姑旦夕在側與兒女無異故有此言丈人亦長老之目今世俗猶呼其祖考為先亡丈人又疑丈當為大北間風俗婦呼舅為大人公丈之與大易為悞耳近代丈士頗作三婦詩乃為匹嫡並耦已之羣妻之意又加鄭衛之辭何其謬乎

吳旦生曰顏之推疑大悞為丈不知古有丈人之稱唐翊仁鮫人潛織詩三日丈人嫌武則天怒魏玄同

賜死于家監刑御史房濟曰丈人何不告密可以自
直史記索隱注韋昭云古者名男子為丈人尊父嫗
為丈人故漢書宣元六王傳所云丈人謂淮陽憲王
外王母即張博母也

黃震云易經丈人程子謂尊嚴之稱朱子謂長老之
稱丈者忝侖尺引之積說文云周制以八寸為尺十
尺為丈人長八尺故曰丈夫論衡云人形以一丈為
正故名男子為丈夫尊翁嫗為丈人淮南子云老者

杖於人為丈人

野客叢書云今人呼丈人為泰山或者謂泰山有丈

人峯故云

青城山記云青城為五嶽之長名丈人山俗呼人婦翁為令嶽妻之伯叔為列嶽因

此歐陽永叔云呼妻父為嶽翁以泰山有丈人峯呼妻母為秦水不知出何書據雜俎載明

皇東封張說為封禪使三公以下皆轉一品說以壻

鄭鑑官九品因說遷五品玄宗怪而問之黃幡綽對

曰泰山之力也與前說不同陳后山送外舅詩丈人

東南英注謂丈人為婦翁之稱三國志獻帝舅車騎

將軍董承而裴松之注謂古無丈人之名故謂之舅
晉書王忱任達婦父常有慘怛乘醉弔之舊唐書
獨孤郁以婦父辭內職憲宗曰權德輿有此佳壻按
裴松之宋元嘉時人呼婦翁為丈人已見此時余因
樂府丈人之語附入此條竊以松之古無丈人之言
未曾深考而勉夫謂南史時已見亦失之也觀史記
漢天子我丈人行則三國前早已有之漢書郊祀志
大山川有嶽山小山川有嶽壻豈以山嶽有壻因謂
婦翁為嶽耶

樓

甄后塘上行邊地多悲風樹木何樓樓

吳旦生曰樓音颼古本楚辭風颼颼今本樓樓今本作蕭而音亦叶颼故樂府亦作蕭蕭又作儵儵總不若樓樓字之古也

按甄后中山無極人為文帝后其後為郭貴嬪譖賜死臨終作此詩而前志云晉樂奏魏武帝蒲生我池中至今題下刊魏武帝字皆謬

秋胡妻

劉子玄曰列女傳載秋胡妻者尋其始末了無才行可稱直以怨懟厥夫投川而死輕生同於古冶徇節異於曹娥此乃凶險之頑人強梁之悍婦輒與貞烈為伍有乖其實焉

吳旦生曰按秋胡宦歸路見美婦願奉以金婦曰婦人當採桑力作以養舅姑不願人之金只此數語節孝昭彰此傳玄所謂烈烈貞女忿言辭厲秋霜也卒

惡其行投河而死謂非列女不可自子玄之論一出
楊升庵謂當祠於妬婦津以劉伯玉妻配享胡元瑞
謂當名秋胡妻所投水曰悍婦川皆非允論橫汚古
烈文人口業一至於此

西京雜記云杜陵秋胡為翟公所禮欲以兄女妻之或曰

秋胡已經娶而失禮妻遂溺死不可妻也馳象曰今之秋胡非昔之秋胡也豈得以昔之秋胡失禮而絕

婦今之秋胡哉

枯桑海水

飲馬長城窟行枯桑知天風海水知天寒入門各自媚

誰肯相為言

吳旦生曰翰注謂枯桑無葉則不知天風海水不凍則不知天寒喻婦人在家不知夫之消息也善注謂枯桑無枝尚知天風海水廣大尚知天寒喻夫在遠不知婦之憂戚也余意合下二句總看乃云枯桑自知天風海水自知天寒以喻婦之自苦自知而他家入門自愛誰相為問訊乎

戰國趙燕皆築長城以備邊自陰山止遼東謂之古

長城至秦始皇西起臨洮東入高麗連亘萬里按酈
道元水經注及樂府廣題謂其南北皆有泉窟漢時
征戍之士飲馬於此乃作是曲王僧虔伎錄以為相
和歌辭之瑟調曲也凡婦人思遠者亦借此題以寄
情焉此則其辭也

雙鯉魚

夷白齋詩話曰客從遠方來遺我雙鯉魚呼童烹鯉魚
中有尺素書魚腹中安得有書古人以喻隱密也魚沈

潛之物故云

吳旦生曰五臣注相思感通夢寐之間若有使來遺者又云命家童殺而開之中遂得書不知此乃想像之詞借枯桑海水以喻他鄉異縣字字神境若說殺魚無乃痴騷按漢時書札相遺或以絹素結成雙鯉之形即緘也非如今人用蠟唐李氏季蘭結素魚貽人云尺素如殘雪結為雙鯉魚欲知心裏事看取腹中書蓋其遺制

長城

陳琳飲馬長城窟行云生男慎莫舉生女哺用脯君獨
不見長城下死人骸骨相撐拄

吳旦生曰秦築長城時死者相屬民歌云生男慎勿
舉生女哺用脯不見長城下尸骸相支柱則孔璋乃
用其時諺語也

竹竿

卓文君白頭吟云竹竿何嫋嫋魚尾何簌簌

吳旦生曰漢鏡歌二十二曲今所傳朱鷺等十八曲而務成玄雲黃雀釣竿四曲無傳焉余嘗擬朱鷺等因為補四曲是也其所謂釣竿者古今注云伯常子避仇河濱為漁父其妻思之每至河側作釣竿之歌後司馬長卿作釣竿詩今傳為古曲也故文君言竹竿魚尾正引伯常子事以諷長卿耳劉坦之補注云嫋嫋篴篴並搖動貌以比相如之心不定又將他圖也


梁父

樂府解題曰梁甫吟蓋言人死葬此山亦葬歌也

吳旦生曰西溪叢語謂張衡四愁詩欲往從之梁父
難注云泰山東嶽也君有德則封此山願輔佐君王
致於有德而為小人讒邪之所阻梁父泰山下小山
名諸葛好為梁父吟恐取此意按青州圖經云三士
冢在臨淄縣南一里三墳週圍一里高二丈六尺張
拙齊記云是烈士公孫捷田開疆古冶子三士冢所

謂二桃殺三士者

遙望蕩陰里解題作追望陰陽里嚴澹浪云青州有陰陽里



歷代詩話卷二十四

欽定四庫全書

集部
歷代詩話卷二十五至
七

詳校官侍讀學士_臣陸伯焜

侍讀_臣孫球覆勘

總校官知縣_臣繆琪

校對官中書_臣李斯咏

謄錄監生_臣章五輅

欽定四庫全書

歷代詩話卷二十五

歸安吳景旭撰

丁集中之下

古樂府

匹

子夜歌理絲入殘機何悟不成匹

吳旦生白字書匹僻吉切偶也配也合也歌中隱匹

配之義此借字寓意也周禮媒氏入幣純帛無過五兩注云必言兩者欲得其配合之名左傳幣錦二兩杜預注云二丈為一端二端為一兩所謂匹也是每匹長四丈中分之二向裏卷其末為二端二端兩也其實只一匹湘山野錄載胡旦致仕遇恩賜束帛當十端夏竦鎮襄陽選縑十匹贈之旦笑曰奉還五匹請檢韓詩外傳及韓康伯等所解束帛戔戔之義自可見證據此則今之贈遺者稱縑帛一匹為壹端悞矣

碁

圍棋燒敗襖著子故依然蓋子夜四時歌之類每以前句比興引喻而後句實言以證之若此甚多

吳旦生曰西京雜記漢元帝好蹴鞠以為勞求相類

而不勞者遂為彈碁之戲

蹴鞠應作擊鞠

碁局方二尺中心

高如覆孟其巔為小壺四角微隆起李商隱詩莫近

彈碁局中心最不平謂其中高也白樂天詩彈碁局

上事最妙是長斜長斜謂抹角斜彈一發過半局今

譜中具有此法柳子厚叙碁用二十四碁者即此戲也藝經云彈碁二人對局白黑碁各八枚先列碁相當下呼上擊之與子厚所記小異如奕碁古局用十七道合二百八十九道黑白碁各百五十六亦與後世法不同矣

世說彈碁魏宮中裝器戲也魏文帝自負此技以手巾角拂之無不中有客著葛巾低頭拂碁妙踰於帝

前溪

漁隱叢話曰于競大唐傳湖州德清縣南前溪村則南
朝集樂之處今尚有數百家習音樂江南聲伎多自此
出所謂舞出前溪者也復齋謾錄言陳劉刪詩山邊歌
落日池上舞前溪唐崔顥詩舞愛前溪妙歌憐子夜長
按智匠古今樂錄晉車騎將軍沈充作前溪歌而非舞
也蓋復齋不曾見于競大唐傳故不知舞出前溪耳

吳旦生曰郝昂樂府解題亦言前溪舞曲也寰宇記
云前溪烏程縣南東流入太湖謂之風渚後漢在市

北餘不亭晉沈充家於前溪余嘗攷前溪一名餘英
溪水出銅峴山東過武康縣前千秋橋又東過縣學
前又自縣學前東過下渚湖南與餘不溪水合是則
前溪屬武康縣非屬德清縣也況德清在唐時名武
源臨溪德清而武康自晉時已名之漢則名餘不鄉
故于競遂悞認之耶

破瓜

徐興公曰古辭碧玉破瓜時郎為情顛倒芙蓉凌霜榮

秋容故尚好夫破瓜時春也芙蓉凌霜秋也春時色美
故使郎顛倒矣而秋時亦不見其不美也

吳旦生曰碧玉晉汝南王妾名孫綽為作碧玉歌一
名千金意按楊文公談苑云呂仙翁有詩與張洎言
將作鼎鼎之句其句云功成當在破瓜年俗以為破
瓜為二八字洎六十四而卒乃悟余因觀李羣玉贈
馮姬詩瓜字初分碧玉年亦謂以瓜字分之則為二
八字也則是古辭破瓜者乃指碧玉十六妙年耶

石澗

讀曲歌云石澗生口中銜悲不得語

吳旦生曰石澗古漢時碑名故取悲字之義子夜歌
作石闕又水經注石的石碑也古名石桓石闕

屈戌

留青日札曰梁簡文詩織成屏風金屈戌李商隱詩鎖
香金屈戌一作屈膝盧照隣詩娼婦盤龍金屈膝李賀
詩屈膝銅鋪鎖阿甄說者以為即鋪首非也蓋既言屈

膝又言銅鋪則非一物明矣予謂即今之蝴蝶扇鉸也
可以屈伸摺疊故可用之屏風也

吳旦生曰鄴中記石虎作金鈕屈膝屏風衣以白練
畫義士仙人禽獸之象高施則八尺下施則四或施
六尺隨意所欲也故段成式詩屏開屈膝見吳娃正
與簡文同用此田子藝據長吉之句遂以鋪首為非
余觀輟耕錄云今人家窻戶設鉸具或鐵或銅名曰
環紐即古金鋪之遺意北方謂之屈戌又戲瑕云曾

見古金屈戌長可尺餘廣象楣棱小殺鏤獸形若饕
餮狀絕細巧衛雙環意即古之金鋪耶據此則鋪首
未為非也正德中薛蕙詩雙環金屈膝

中州集劉迎詩寶箱拂塵金鋸鉞

莫愁

莫愁樂云莫愁在何處莫愁石城西

吳旦生曰唐書樂志石城有女子名莫愁善歌謠盖
盧家女一云為妓嘗召入楚宮今郢州有莫愁村是

也顧太初莫愁考云莫愁村今在承天府漢江西石
城在州西北晉羊祜所建鄭谷詩石城昔為莫愁鄉
莫愁魂散石城荒王橫詩村近莫愁連竹塢人歌楚
些下蘋洲即此也

梁武帝樂府云河中之水向東流洛陽女兒名莫愁
莫愁十三能織綺十四採桑南陌頭十五嫁為盧家
婦十六生兒字阿侯盧家蘭室桂為梁中有鬱金蘇
合香此蓋洛陽人沈佺期詩盧家少婦鬱金堂李商

隱詩如何四紀為天子不及盧家有莫愁即此也則
莫愁有兩人矣

李本寧莫愁湖記云還將盧女曲夜夜奉君王則魏
時宮人故將軍陰升之姊明帝崩出嫁為尹更生妻
者也由此言之古今有三莫愁而盧氏多好女今湖
山爭借以為重乎

宋曾三異云曾見莫愁像石本衣冠甚古乃古神仙
者流非女子郢中倡女竊其名

估客樂

楊升庵曰估客樂齊武帝所作令釋寶月被之管絃帝
數乘龍舟遊江中以紅越布為帆綠絲為帆緯鋤石為
篙足篙榜者悉著鬱林布作淡黃袴舞此曲用十六人
按史稱武帝節儉常自言朕治天下十年當使黃金與
土同價然其徒流忘反之奢如此貽厥孫謀何恠乎金
蓮步地也

吳旦生曰古今樂錄帝布衣時嘗遊樊鄧登阼以後

追憶往事而作歌敕歌者常重為感憶之聲故其辭
曰昔經樊鄧役阻潮梅根渚感憶追往事意滿辭不
叙攷其情事亦是漢太上新豐之意也區區布帆絲
緯便足云奢其視隋煬之龍舟鳳舸殿脚女千人更
為何如胡元瑞云當使黃金與土同價高帝語也武
帝繼高亦有節儉之稱南史齊書並可考見

釋寶月
所上曲

云有信數寄書無信心相憶古謂使者曰信按越告
釋子吳使素忠為信晉武帝帖云故遣信還南史晨

走出陌頭屬與信會虞永
興帖云事以信人口具

雙行纏

墨莊漫錄曰婦人之纏足前世無傳齊東昏侯為潘妃
鑿金蓮貼地曰此步步生蓮花然不言其弓小也六朝
詞人無一言稱纏足者唐詩亦無及之惟韓偓咏嫠子
詩六寸膚圍光緻緻唐尺短校之亦小也而不言其弓
楊升庵曰弓足始於五代李後主非也六朝樂府有雙
行纏其辭云新羅綉行纏足趺如春妍他人不言好獨
我知可憐唐杜牧詩鈿尺裁量減四分碧琉璃滑裏春

雲五陵年少欺他醉笑把花前出畫裙段成式詩醉袂
幾侵魚子纈影纓長夏鳳凰釵知君欲作閒情賦應願
將身作錦鞋花間集詞云慢移弓底綉羅鞋則此飾不
始於五代也

吳旦生曰焦弱侯謂樂府有雙行纏乃是行滕即足
衣也胡元瑞謂雙行纏婦人以襯襪中者即今俗談
裏脚也唐以前婦人未知扎足勢必用此與男子同
男子以帛婦人則羅為之加文繡為美觀以蔽於襪

中故他人不言好獨所懼知之語意明甚楊妃馬嵬
所遺足徵唐世婦人皆著襪今婦人纏足其上亦有
半襪罩之謂之膝襪恐古羅襪或此類又御覽云昔
製履婦人圓頭男子方頭欲別男女也太康婦人皆
方頭履男子無異則六朝前婦人之履斷可識矣車
若水謂後漢戴良嫁女練裳布裙竹筍木屐據三氏
之言則扎脚斷非古時之事如古今事物考云起于
妲己留青曰扎云起于西施皆非也自李後主宮嬪

宵娘以帛繞脚屈上如新月狀由是人皆效之可謂
弓足非始於後主乎

嫫媿

梁武帝遊女曲云珠佩嫫媿戲金闕

吳旦生曰嫫媿音果火按說文女侍曰嫫讀若駟或
若委孟子曰舜為天子二女嫫媿果切媿弱也五果
切字學集要云嫫單作果又身弱好貌韻畧云媿身
弱貌韓退之元和聖德詩日君月妃煥赫嫫媿

欽定四庫全書



歷代詩話

歷代詩話卷二十五

欽定四庫全書

歷代詩話卷二十六

歸安吳景旭撰

丁集下之上

古樂府

巴渝

樂府原題曰巴渝本舞名即鞞舞也漢高自蜀漢將定三秦閬中范因率賁人以從為前鋒號板楯蠻勇而善

鬪及定三秦封因為閬中侯復賓人七姓其俗善舞高
帝使樂人習之閬中有渝水因以為名故曰巴渝舞

吳旦生曰華陽國志謂巴師勇銳歌舞以凌殷人倒
戈故世稱之曰武王伐紂前歌後舞也又謂閬中有
渝水賓民多居水左右天性勁勇初為漢前鋒陷陣
銳氣喜舞帝善之曰此武王伐紂之歌也乃令樂人
習學之今所謂巴渝舞也按舞曲四篇一曰矛渝二
曰安弩渝三曰安臺四曰行辭其辭既古莫能曉其

句讀英雄記云曹公破袁譚馬上舞三巴曹植鞞舞
詩序云故西園歌吹李堅者能鞞舞先帝下書召堅
堅年踰七十中間廢而不為因攷魏使王粲制其辭
粲問巴渝帥而得歌之本意改為矛渝新福弩渝新
福曲臺新福行辭新福四曲以述魏德李贇皇云巴
渝末曲猥蒙漢祖之知西域傳作俞蜀都賦云奮之
則賓旅翫之則渝舞梁簡文蜀道難云若奏巴渝曲
時當君思中

濁

獨漉獨漉水深泥濁

吳旦生曰濁音獨漉濁為韻自叶按古音略引史記律書濁者觸也白虎通瀆者濁也孺子之歌滄浪之水濁兮可以濯我足漢書潁川歌潁水濁灌氏族陳張君祖詩風來詠愈清鱗萃淵不濁斯乃玄中子所以矯逸足又俗謂不明曰瞽濁以酒為喻也或作鶻突又作糊塗並非

白紵

韻語陽秋曰樂府解題譽白紵曰質如輕雲色如銀製
以為袍餘作巾袍以光軀巾拂塵王建云新縫白紵舞
衣成來遲邀得吳王迎元稹云西施自舞王自管白紵
翻翻鶴翎散則白紵舞衣也王建云新換霓裳月色裙
豈霓裳羽衣舞亦用白耶

吳旦生曰宋書樂志曰白紵舞按舞辭有巾袍之言
紵本吳地所出宜是吳舞也晉俳歌云皎皎白緒節

節為雙吳音呼緒為紵疑白緒即白紵也南齊書樂志曰白紵歌周處風土記吳黃龍中童謠云行白者君追汝句驪馬後孫權征公孫淵浮海乘舶舶白也今歌和聲猶云行白紵焉後見樂府原題云白紵歌有白紵舞白鳧歌有白鳧舞並吳人之歌舞也吳地出紵又江鄉水國自多鳧鶩故興其所見以寓意焉始則田野之作後乃大樂氏用焉此解最確

歷代詩話卷二十六

欽定四庫全書

歷代詩話卷二十七

歸安吳景旭撰

丁集下之下

古樂府

路傍兒

張率走馬行云歛轡且歸去吾畏路傍兒

吳旦生曰樂府集載張敞為京兆尹無威儀時罷朝

會過走馬章臺街風俗曰殺君馬者路傍兒也言長吏馬肥觀者快之乘者喜其言驅馳不止至于死故曰吾畏路傍兒按崔豹古今注曰走馬引柙里牧恭所作也為父報怨殺人而亡匿於山之下有天馬夜降圍其室而鳴覺聞其聲以為吏追奔而亡去明旦視之乃天馬跡也因惕然大悟曰豈吾所處之將危乎遂荷糧而逃入于沂澤中援琴而鼓之為天馬之聲曰走馬引解題一曰天馬引

大風

唐溪詩話曰漢高帝大風歌不事華藻而氣槩遠大真英主也至武帝秋風辭言固雄偉而終有感慨之意故其末年幾至於變魏武魏文父子橫槊賦詩雖道壯抑揚而乏帝王之度六朝以後人主言非不工而纖麗不逞無足言也

吳旦生曰大風歌史記樂書謂之三侯章令沛得以四時歌舞宗廟蓋欲使後之子孫知其祖創業之勤

不可怠於守成爾索隱曰侯語辭也兮亦語辭也歌有三兮故曰三侯按兮侯古韻通據此則高帝過沛時已有此歌惠帝二年命夏侯寬為樂府令而漢書云武帝立樂府後人遂謂樂府起於武帝非也

蘇頌濱云高帝豈以文字高世者哉帝王之度固然發於其中而不自知也李白詩反之曰但歌大風雲飛揚安用猛士守四方其不識理如此

香宇外集云彈缺歌一句易水歌二句大風歌三句

南風歌四句夏人歌五句屢屢歌六句夫歌以永言
今只此數篇略略數句而聖賢王霸俠士婦人氣象
自別又何必連篇累牘以辭相侈哉

柏

瓠子之歌云魚弗鬱兮柏冬日

吳旦生曰柏與迫同按柏人城在順德府唐山縣漢
高過此欲宿心動問縣何名曰柏人高祖曰柏人者
迫於人也不宿而去瓠子注云水長涌溢穢濁不清

故魚不樂又迫冬日將甚困也

李夫人歌

許彥周詩話作立而望之偏云此退之走馬來看立不正之所祖也

吳旦生曰齊人少翁有神術能令武帝遙見好女如李夫人之貌還幄坐而步不得就視帝益悲感而作歌所以狀其髣髴據樂府古本作翩字合下嫋嫋仍得妙麗善舞之遺態原非偏而不正之謂況此歌乃

之選叶韻翩字應屬下句若屬上則不成句

史記武帝本紀云上有所幸王夫人卒少翁以方術
夜致王夫人貌又徐廣注封禪書謂外戚傳曰趙之
王夫人則與李夫人異矣

香囊

繁欽定情篇香囊繫肘後焦仲卿妻古辭四角垂香囊
吳旦生曰晉謝玄佩紫羅香囊謝安患之而不欲傷
其意因戲賭取焚之按婦人之幃謂之縞即香囊也

楚辭蘇糞壤以充幃王逸注幃謂之騰騰香囊也椒
又欲充其佩幃注幃盛香之囊也說文騰本作幃韻
會騰囊可帶者後漢儒林傳制為騰囊注即騰也南
史麝騰注今之香袋

雙鍼

繁欽定情篇云何以結中心素縷連雙鍼

吳旦生曰昔有姜氏與隣人文冑通殷勤文冑以百
鍊水晶鍼一函遺姜氏姜氏啟履箱取連理線貫雙

鍼結同心花以答之見謝氏詩源

長楸

曹植名都篇鬪雞東郊道走馬長楸間

吳旦生曰選注古人種楸于道故曰長楸沈炯邊馬
有歸心詩彌憶長楸道金鞍背落暉老杜玉腕騶詩
頓驂飄赤汗跼蹐顧長楸東坡題牧馬圖詩至今霜
蹄踏長楸山谷和詩長楸落日試天步皆原本陳思

寒籬

楊升庵曰曹子建名都篇寒鼈炙熊膳此舊本也五臣
妄改作魚鼈蓋魚鼈膾鯉毛詩舊句淺識者孰不以為
寒字誤而從魚字耶不思寒與魚字形相遠音呼又別
何得誤至於此文選李善注云今之時餉謂之寒蓋韓
國饌用此法鹽鐵論羊淹雞寒崔駰傳亦有雞寒曹植
文寒鷄蒸麇劉熙釋名寒雞為正古字寒與韓通也
吳旦生曰改寒作魚五臣之陋不足攻矣第攷文選
宋板善本李善注並無今之時餉謂之寒句據曹子

建七啟云寒芳蓮之巢龜注謂今之脰寒也資暇集
李氏云今之腊肉謂之寒今脰肉也廣韻云煮肉熟
食曰脰或者時餉二字乃腊肉之譌而升庵好異一
時悞錄不遑致詳耳

何元朗云升庵不當謂韓國饌法蓋膾臠炙皆言烹
飪不容寒獨稱地當是鼈與雞皆性寒易凍如今人
言凍鼈雞凍是也若云韓鼈猶可通以雞寒為雞韓
可乎余以元朗通士乃作此懣語按逸雅云韓羊韓

兔韓雞本法出韓國所為也猶酒言宜城醪蒼梧清之屬也此證最確以寒訓凍可笑

乘蹻

曹子建升天行乘蹻追術士遠之蓬萊山

吳旦生曰抱朴子乘蹻可以周流天下蹻道有三法
一曰龍蹻二曰氣蹻三曰鹿盧蹻

字學集要云蹻有五音音皎舉足加高貌彊直貌武貌又音喬蹻也慢也又音脚舉足行高又與屨同履

也又音喙驕甚

井公

王褒輕舉篇云誰能攬六博還當訪井公

吳旦生曰楊升庵謂古樂府井公能六博玉女善投壺蓋因井星形如博局而附會之亦詩人北斗挹酒漿之意也胡元瑞引穆天子傳第五卷紀王與隱士井公博三日不決一卷中凡兩見井公必當時有道之士致周穆以萬乘之尊屢從博戲亦奇矣王褒二

語正用周穆訪隱士事若天上井星從何訪之庾信

詩藏書凡幾代看博已千年圖經稱穆天子藏書於

大酉山小酉山亦用周穆事也余觀神異經亦載井

公事愈知元瑞之說較升庵為確

樂府登名山行有藏書凡幾代看博

已經年為隋李巨仁作

又升庵謂六博即骰子元瑞謂其時未

有也余觀西京雜記云許博昌善陸博法用六箸以竹為之長六分王逸注楚辭云投六箸行六棊故為六博以篋籥作箸象牙為棊麗而且好也說文六箸

十二碁也鮑宏博經云六博用十二碁分白黑各半
擲之據此則曹植所云仙人攬六箸對博太山隅與
其旨義悉合何得謂是骰子

閭門樓

陸機吳趨行云閭門何差我飛閣跨通波重櫟承游極
迥軒啟曲阿

吳旦生曰吳地記閭闔門者吳王闔閭所作也名為
閭闔門高樓閣道後從此出伐楚改曰破楚門故士

衡云爾至宋淳熙間其間門之舊樓三間猶存建炎
兵火之後不復有矣蘇子美詩年華冉冉催人老雲
物蕭蕭又變秋家在鳳凰山下住江山何事苦相留
子美猶及見此樓也

香

王直方詩話云古辭云博山鑪中百和香鬱金蘊合及
都梁又云麝毳毳五木香迷迭艾納及都梁按廣志
都梁香出交廣形如藿香迷迭出西域魏文帝有迷迭

賦信乎不行一萬里不讀萬卷書不可讀老杜詩也漁
隱叢語曰王直方何鹵莽如此方論古辭香事初不論
杜詩遽有不行一萬里不讀萬卷書不可看杜詩之語
野客叢書曰漁隱不深察耳直方蓋謂大凡古詩中多
有事蹟但人讀書不多見識不廣所以不知使不觀廣
志等書孰知都梁等香事因悟所謂不行一萬里不讀
萬卷書不可看杜詩之語為信然漁隱自鹵莽如此反
謂直方鹵莽其可笑也迷迭賦如曹植王粲應瑒陳琳

之徒皆有是作不但文帝一人而已故梁元帝志蕭琛
曰迷迭成章江總表曰迷迭之文云云

吳旦生曰此吳均行路難之語也數香皆非僻產何
足聚訟按史記武帝元朔二年封長沙定王子遂為
都梁侯水經注云都梁縣有小山山有渟水其中悉
生蘭草綠葉紫莖芳風藻川蘭馨遠馥俗呼蘭為都
梁山因以號縣受名焉荊州記云蘭草名都梁香形
如藿香廣志云都梁香出交廣亦名煎澤草

按魏畧云鬱金生大秦國二三月花如紅藍四五月
採之其香十二葉為百草之英埤雅鬱之為草若蘭
說文鬱芳草也十葉為貫百廿貫築以煮之為鬱漢
制攷云鬱鬯百草之華遠方鬱人所貢芳草合釀之
以降神鬱今鬱林郡也觀禮以鬯草生庭為瑞則鬱
本遠方所貢粧樓記云染婦人衣最鮮明然不耐日
炙染成衣則微有鬱金之氣

按南史云大秦國出蘇合香是諸香汁煎之非自然

一物也又大秦人采蘇合先竿其汁以為香膏乃賣其滓夢溪筆談云今之蘇合香如堅木赤色又有蘇合油如糯膠今多用此為蘇合香考劉夢得傳信方云皮薄子如金色按之即小放之即起良久不定如蟲動裂者佳據此則酉陽雜俎謂獅子糞固非即陶隱居所稱色如紫檀重如石燒之灰白者亦未真也

黃姑

古辭東飛伯勞西飛燕黃姑織女時相見

吳旦生曰張平子天象賦河鼓集軍以嘈雜噴張茂
先李淳風等注云河鼓三星在牽牛星北主軍鼓蓋
天子三軍之象淮南子所謂烏鵲填河成橋而渡織
女俗傳七夕牛女相過者此也海錄碎事云楚人呼
牽牛星為檐鼓爾雅云何鼓謂之牽牛何荷也亦檐義
也荆楚歲時記云河鼓黃姑牽牛也皆語之轉若李
後主詩迢迢牽牛星杳在河之陽粲粲黃姑女耿耿
遙相望則誤認黃姑為織女矣李太白詩黃姑與織

女相去不盈尺然以星厯攷之牽牛去織女隔銀河七十二度古詩所謂盈盈一水間默默不得語安得謂不盈尺耶焦林大斗記云天河之西有星煌煌與參俱出謂之牽牛天河之東有星微微在氐之下謂之織女春秋斗運樞云牽牛神名石氏星經云牽牛名天關佐助期云織女神名收陰史記天官書云織女是天帝外孫漢書天文志云天之貞女至於道書云牽牛娶織女取天帝錢二萬備禮久而不還被

驅在營室劉子儀詩天帝聘錢還得否而盧仝有癡
牛駢女之句亦誣甚矣

容齋隨筆云蒼梧王當七夕令楊玉夫伺織女渡河
曰見當報我不見當殺汝蒼梧荒悖小兒不足笑梁
劉孝儀詩欲待黃昏至含嬌淺渡河唐人七夕詩皆
有此說自是牽俗遣詞之過按天上經星終古不動
安有所謂渡河之理故老杜有詩云牽牛出河西織
女處其東萬古永相望七夕誰見同神光竟難候此

事終蒙朧其識非他人比也

廝養卒

楊升庵樂府序曰觀樂府有邯鄲才人嫁為廝養卒婦篇特亡其辭亦失其解及考史記張耳傳洎楚漢春秋并云趙王武臣為燕軍所獲囚於燕獄先後使者往請輒為燕所殺趙有廝養卒謝其舍中曰吾將載趙王歸舍中人笑之乃走燕壁以利害說燕將燕以為然乃歸趙王廝養卒御王以歸武臣歸趙以美人妻養卒以報

之是其事也

吳旦生曰李襲謂張耳傳祇云廝養卒並無才人嫁
為婦語曷以知所嫁者即此卒耶陳耀文謂此事史
漢并同注中俱無楚漢春秋字余按古辭已亡謝朓
所作但言自宮閣而出徒增悲羞亦不及武臣陷燕
意也然據升庵引張耳傳洎楚漢春秋明是兩種書
陳晦伯謂注中無楚漢春秋字是不細看升庵一洎
字也升庵淹博必見楚漢春秋有此語因合張耳傳

而並舉之以立此說

張耳傳趙有廝養卒蘇林注云廝取薪者也養養人者也蓋廝主樵蘓養主烹飪此通鑑所謂竈下養中郎將也本皆賤者之事田子藝謂廝養卒當為廝扈卒按左傳廝役扈養注養馬者曰扈炊烹者曰養則扈別是一役矣

愛妾換馬

樂府解題曰舊說淮南王所作淮南王即漢劉安也古

辭今不傳

吳旦生曰中唐張祜作此題二律亦引樂府解題自注其下然觀魏任城王曹彰性倜儻見駿馬愛之其主所惜也彰曰予有美妾可換惟君所選馬主因指一妓彰遂換之馬號白鶻後因獵獻於文帝竊以任城之說較淮南為可據宋人詩話乃以鮑生出四絃換韋生紫叱撥為證余按唐李玢異聞實錄云鮑以女伎善四絃者換韋紫叱撥會飲未終有二人造席

適聞以妾換馬可作題共聯賦否一曰香暖深閨未
厭夭桃之色風清廣陌曾憐噴玉之聲一曰香散綠
驄意已忘於鬢髮汗流紅額愛無異於凝脂客自稱
江淹謝莊也則是開成以後事引此較淮南更悞

流蘇

徐陵雜曲云流蘇錦帳挂香囊織成羅幌隱燈光

吳旦生曰流蘇者乃盤線繡繪之球五色錯為之同
心而下垂所謂雜綵為同心垂垂若流蘇也前漢禮

樂志薛瓚注作流遡周禮金鐺節鼓鄭玄注云後世
合宮懸用之而有流蘇之飾盖古者樂器之飾而後
世用為幃帳之懸自晉以後始也又析羽曰流蘇摯
虞云緝鳥尾垂之若流然以其蕊下垂故曰蘇今之
旌竿上綴旒也又晉書割流蘇為馬幟南都賦駙承
華之蒲梢飛流蘇之騷殺注蒲梢汗血馬也言取華
廢蒲梢之馬而以流蘇五采為馬飾也騷殺飄揚貌
又石頭百姓歌云庾公還揚州白馬牽流蘇焦仲卿

妻云躑躅青驄馬流蘇金鏤鞍則不止幃帳間所懸而且飾旌又飾馬矣

昔昔鹽

貴耳集曰薛道衡空梁落燕泥之句詩名昔昔鹽十韻樂苑以為羽調曲玄怪錄載蘧蔭三娘唱阿鵲鹽又有突厥鹽黃帝鹽白鴿鹽神雀鹽疎勒鹽滿座鹽歸國鹽唐詩媚賴吳娘唱是鹽更奏新聲刮骨鹽謂之鹽者吟行曲引之類樂府解題謂之杖鼓曲也

吳旦生曰楊升庵謂梁樂府夜夜曲或名昔昔鹽昔
即夜也引列子昔昔夢為國君證之余觀海錄碎事
云十四昔十四夕也信其說為最確升庵別本乃引
戴記示之禽而鹽諸利注與艷同使歆艷也鹽者艷
之轉聲也此語殊誤余且以他曲例之如禰衡鼓歌
云邊城晏開漁陽搽黃塵蕭蕭白日暗吳淑改搽字
為操徐鍇曰搽音七鑒反鼓曲也以其三過故因謂
之搽又如韓臯鼓廣陵散其說謂母丘儉諸葛誕刺

揚州舉兵討晉不成而散於廣陵耳劉道原謂漢魏時揚州治壽春儉誕皆死壽春至隋唐廣陵始為揚州而散平聲是琴曲名如操弄摻淡序引之類然則

鹽與摻散皆是曲之別名也

唐詩紀事云施肩吾詩顛狂楚客歌成雪媚賴

吳娘笑是鹽蓋闕中人謂好為鹽也皇甫百泉云昔昔鹽亦此意也樂府有魏俞吳俞劍俞矛俞弩俞俞也善也

元遺山詩鹽紅忘後顧鰲黑見前驅按此鹽字作去聲

葢女

樂府解題曰桓帝初京都童謠云車班班入河間者言桓帝將崩乘輿班班入河間迎靈帝也河間姹女工數錢者靈帝既立其母永樂太后好聚金錢也

吳旦生曰以姹女指太后此說大謬及觀善本乃作葢女按關尹子嬰兒葢女謂未破瓜時也本草葢葢含胎之語出此留青日札云月運紅潮取以入藥則名紅鉛女子十四而天癸發取其初發之中有一粒

如小荳者色微黃即所謂黃花也蓋黃花之義亦從
藍字生

雞鳴歌

東方欲明星爛爛汝南晨雞登壇喚

吳旦生曰徐陵烏棲曲惟憎無賴汝南雞天河未落
猶爭啼野客叢書引李賀詩雄雞一聲天下白溫飛
卿詩碧樹一聲天下曉謂出於古之雞鳴歌汝南晨
雞登壇喚月沒星稀天下旦據此則直謂是雞鳴矣

漢舊儀云汝南出長鳴鷄余竊以為皆謬也按漢時
於汝南取能雞鳴歌之人耳樂府廣題云漢有雞鳴
衛士主鷄唱宮外漢書云高祖圍項羽垓下羽是夜
聞漢軍四面皆楚歌應劭注楚歌者鷄鳴歌也

窮袴守宮

樂辭云愛惜加窮袴防閑託守宮

吳旦生曰僧惠洪於客邸破篋中見詩編皆晉簡文
時名公卿而樂府有此二語按說文袴脰衣也釋名

袴跨也兩股各跨別也方言齊魯之間謂之襜或謂之襜褕西謂之袴大袴謂之倒頓小袴謂之褙衲楚通語也又袴謂留幕冀州所名又新羅國謂袴曰柯半而窮袴之義何居西漢上官后傳宮人使令皆為窮袴多其帶服虔注云窮袴有前後襠不得交通也師古注即今之裊襠袴也則知古人袴皆無襠女人用襠者其制起自上官后為霍光外孫欲擅寵而使宮人為之今則男女皆服之矣

楊升庵云視三代不見所述周文王所製視長至膝
謂之弊衣賤人不下服曰良衣蓋良人之服也至魏
文帝賜宮人緋交襠卽今之視

方言秦晉西夏謂之守宮或謂之蟪蟪或謂之蜚易
其在澤中者謂之易蜚南楚謂之蛇醫或謂之蠓蟪
東齊海岱謂之蟪蟪北燕謂之祝蜚桂林之中守宮
大者而能鳴謂之蛤解博物志云蜥蜴或名蟪蟪以
器養之食以朱砂體盡赤所食滿七斤搗萬杵點女

人支體終身不滅惟房室事則滅故號守宮傳云東

方朔奏漢武試之有驗

誠齋雜記云秦始皇時有人進守宮謂能典鑰人不敢竊

發又謂置於宮中宮人之有異志者即吐血汚其衣此二說與博物志異

景泰中湯公讓守宮詩誰解秦宮一粒丹記時容易
守時難鴛鴦夢冷腸堪斷蜥蜴魂銷血未乾榴子色
分金釧曉茜花光映玉韉寒何時試拭香羅袖笑語
東君仔細看劉欽謨曰此何減李商隱

艷潏歌

蜀中詩話曰梁簡文灝瀕歌灝瀕大如馬瞿塘不可下
金沙浮轉多桂浦忌經過鄭樵云天下水之險者惟蜀
之瞿塘百粵之桂浦此歌言行瞿塘者準灝瀕行桂浦
者準金沙也楊用修以為商估刺水行舟歌非簡文之
作俗本改桂浦作桂楫尤非按灝瀕一作滫預一作猶
豫載各不同

吳旦生曰鄭樵樂府原題載其辭云滫預大如服瞿
唐不可觸金沙浮轉多桂浦忌經過此舟人商客刺

水行舟之歌亦非簡文所作也蜀江有瞿唐之患桂江有江浦之難故過瞿塘者則准灩澦涉桂浦者則准金沙又有灩豫如馬瞿唐莫下灩豫如象瞿唐莫上之語是單言瞿唐也據此則曹能始所載之歌馬下叶者與樂府本辭異是悞以如馬如象之語入灩豫金沙之歌矣況行舟之歌非簡文作此即鄭樵語也乃於引據鄭樵之後另標用修云云是但見用修詩話謂屬其語不知用修往往採古人之言而述其

善者能始實未攷鄭樵全本也

三峽歌云巴東三峽巫峽長猿鳴三聲淚

沾裳復齋以為峽州行者歌而漁隱據為簡文作亦悞也水經注謂是漁者歌

樂府解題云瞿盛也唐陂池也言盛水其中可以行舟也又云夏則為瞿冬則為唐


水經注灩澦堆在夔州府城西有孤石冬出水二十餘丈夏即沒益州記又曰猶預言舟子取途不決水脈故猶預也

類要云滠預大如鼉瞿塘行舟絕滠預大如龜瞿塘

不可窺南史灝灝如牛一作本不通瞿塘水退為庾

公李太白詩五月不可觸猿鳴天上哀杜子美詩沈

牛答雲雨如馬戒舟航



歷代詩話卷二十七